

22 DEC 2002

PUISI DR MAHATHIR DILAGUKAN PADA DEKLAMASI ANGKASAPURI 2002 MALAM
INI

KUALA LUMPUR, 22 Dis (Bernama) -- Puisi Perdana Menteri Datuk Seri Dr Mahathir Mohamad bertajuk "Di Atas Runtuhan Kota Melaka Kita Dirikan Putrajaya" dilagukan buat pertama kali pada Deklamasi Angkasapuri 2002 di sini malam ini.

Puisi itu yang dideklamasikan oleh Dr Mahathir buat pertama kalinya pada Pesta Puisi Patriotik 2001 di Putrajaya pada 29 Ogos tahun lepas telah dijadikan lagu puisi oleh Ibrahim Bachik dan disampaikan enam penyanyi.

Antara mereka yang menyanyikan lagu itu ialah Naseer Wahab, Khairul Johari Johar dan Rozita Izlyn.

Deklamasi Angkasapuri 2002 yang diadakan di Auditorium Perdana, Angkasapuri itu disiarkan secara langsung menerusi Rangkaian Satu RTM. Turut hadir pada majlis itu ialah Menteri Penerangan Tan Sri Khalil Yaakob dan timbalannya Datuk Zainuddin Maidin serta Timbalan Menteri Sumber Manusia Dr Abdul Latif Ahmad.

Acara selama dua jam itu dibahagikan kepada empat segmen iaitu Cinta, Ketuhanan dan Kemanusiaan, penghargaan kepada Sasterawan Negara allahyarham Datuk Dr Usman Awang dan Patriotik yang dikhaskan untuk Dr Mahathir.

Antara penyajak yang menyampaikan puisi pada acara itu ialah Kumpulan Puncak Santubong Unimas, Zubir Ali dan Pyan Habib.

Penyanyi Siti Nurhaliza pula membawa lagu puisi ciptaan Habshah Hassan bertajuk "Lelaki" sebagai mengakhiri acara itu.

-- BERNAMA
SOP HK RHM